



partii naleraq

Nuuk, 14. april 2015

Anthon Frederiksen

**UPA2015/56**

**Aalisarnermut immikkoortitat pillugit Inatsisartut inatsisaata allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni isaterinissamut tapiissutinik akiliuteqarnermi aalisarsinnaanermut akuersissutit siunissami atorunnaarsinnissaat periarfissaaJunnaassalluni.**

(Inatsisartunut Ilaasortaq Hans Enoksen, Partii Naleraq)

### **Siullermeerneqarnera**

Inatsisartunut ilaasortap Hans Enoksenip Partii Naleqqamiit siunnersuutaa imannak oqaaseqarfigissuarput.

Nunatta oqaluttuarisaanerani piniarneq siusinnerusukkut inuussutissarsiutit pingaarnersarisimavaat maannamut suli aamma annertuumik inuuniarnikkut tapertaasoq.

Kisianni tamanit ilisimaneqartutut aalisarneq ukiut kingulliit 50-it missaanniit inuussutissarsiornermi pingaarnersimavoq, maannamullu nunatsinniik avammut niuernitsinni pingaarnersaalluni.

Oqaluttuarisaanermi aalisarneq qaannamiit, umiaasanut, pujortuleeqqanut umiatsiaaqqanullu, raajarniutitut aammalu kilisaatinut ineriartorneq aalisartut eqiinganerisigut qujanartumik annertusigaluttuinnarsimavoq.

Piffissami tassani ilaatigut inuussutissarsiutitut tapersiisarfik (ESU) ineriartornermi aamma pingaaruteqarsimaqaaq, kisianni uggornaraluartumik 1990-ikkut naalernerata tungaanut inuussutissarsiutitut tapersiisarfik taanna Naalakkersuinikkut atorunnaarsikkiartorneqarpoq, naak taamanikkulli naluneqanngereeraluartoq aamma aalisartut piumasarigaluaaraat aalisariutit pisoqalisut taarsersorneqarnissaat ilaasalu nutarterneqarnissaat pisariaqarluinnaraluartoq.

Tamatta nassuerutigisariaqarparput inuussutissarsiornermut tapersiisarfiup atorunnaarsinneqarnerata kingunipiluisa ilai maannakkut atuummata, taamaammallu aamma angallaterpassuit uneraannarsimasut ilaatigullu avatangiisinut kusanarpallaanngitsumik ilai sissamut qanittumi kiviorartinneqaannarsimannikkunik sulii sumi tamaani ilarpassui takussunarsaataannartut inissisimalersimallutik.

Taamaammat aamma pinngortitaq avatangiisillu eqqarsaatigalugit aalisariutikorpassuit sumi tamaani atorunnaarsimasut arlaatigut iliuuseqarfigineqarnissaat pisariaqartoq Partii Naleqqamiit isumaqarpugut.

Taamaammat aamma Inatsisartunut ilaasortap Hans Enoksen-ip Partii Naleraq sinnerlugu siunnersuutaanut tunngatillu takuneqarsinnaavoq; aalisariutit pisoqalisut atorneqarunnaarnerannut atatillugu isaterinermut aningaasaliisarnissaq pisariaqartoq, tassami soorlu aamma Partii Naleqqamiit 2015-imut aningaasanut inatsisissatut siunnersuummut atatillugu piumasaqaatigigipput aamma 2015-imi ukiunullu missingersuusiorfiusunut aalisariutit atorunnaartut isaterneqarnissaannut aningaasaliisoqartariaqartoq.

Taama oqareerluta aamma siunnersuuteqartoq tamakkiisumik taperserlugu Partii Naleqqamiit piumasaqaatigaarput, aalisartut siunnersuuteqartup eqqartugai, angallatitoqqap isaterneqarneranut atatillugu aalisarnermut akuersissummik arsaarneqartarnerat Partii Naleqqamiit akuersaarsinnaanngilluinnaratsigu.

Aamma Partii Naleqqami isumaqarpugut aalisartut imaluunniit aalisartoq kisimiikkuni imaluunniit piginneqatigiinneq aqputigalugu aalisariuteqarsimappat imaluunniit aalisariuteqarsimappata, tassani aalisartunik assigiinngisitsineq atorunnaarsinneqartariaqartoq Partii Naleqqamiit aalajangiusimavarput.

Taamaammallu siunnersuut tamakkiisumik taperserlugu sulii aappassaaneeraneqannginnerani aalisarnermut ataatsimiititaliami suliarineqarnissaa inassutigaaarput.